

四庫全書

史部

欽定四庫全書

史部

宋宰輔編年錄卷十八

詳校官太常寺少卿臣陳桂森

編修臣程嘉謨覆勘

總校官庶吉士臣張能煦

校對官編修臣許兆椿

謄錄舉人臣胡鼎蓉

欽定四庫全書

宋宰輔編年錄卷十八

宋 徐自明 著

孝宗淳熙元年

甲午

三月丙申鄭聞罷叅知政事

除資政殿大學士四川宣撫使

聞自乾道九年正月除簽書樞密院事十月除叅知政事是年三月罷執政一年餘

四月己卯姚憲叅知政事

自端明殿學士簽書樞密院事遷中大夫除

是年三月省文階左右字

葉衡端明殿學士簽書樞密院事

自朝散大夫戶部尚書除六月丁丑兼權

叅知

政事

六月戊寅曾懷罷右丞相

觀文殿大學士提舉太平興國宮依前官宣奉大夫

制曰全進退之義大臣式謹於廉隅存終始之恩明主

蓋優於體貌乃眷弼諧之老懇辭宰柄之勤爰錫明綸

敷告列位

具官曾懷

疏通而膚敏靖重而裕和挺挺祖風綽

有典刑之舊恢恢才刃了無盤錯之難自簡予衷言績

之事十年主計源流本末之洞知一節匪躬獻納論思

之不替越躋政路擢真鼎司庶幾穆天緯而迪民彝于
以持道揆而嚴法守曾閱時之未久乃移疾而有陳近
醫藥而專精神既屢頒於中詔乞骸骨而上印綬復薦
貢於忱詞既雅志之莫回哀寵章而加賁冠崇班於書
殿允為儒者之榮賦厚祿於祠庭仍就里門之逸茲誠
異數庸表眷懷於戲后德惟臣雖莫遂貪賢之美爾身
在外尚無忘告后之猷益介壽祺永綏譽處

王淮
詞

懷自乾道九年十月拜右丞相是年六月罷入相

凡七月

癸未姚憲罷叅知政事

除端明殿學士在外宮觀

憲自乾道九年十二月除簽書樞密院事是年四月除叅知政事六月罷在政府半年言者論憲與臺臣詹亢宗等通謀陷曾懷以傾奪其相位故有是命憲尋責居南康軍

同日葉衡叅知政事

自端明殿學士簽書樞密院事兼權叅知政事遷中大夫除十月

詔魚權知

樞密院事

七月丁亥鄭聞叅知政事

自資政殿學士大中大夫四川宣撫使除

聞再為叅知政事十月丁卯卒輟朝

壬辰曾懷右丞相

自觀文殿大學士提舉太平興國宮遷光祿大夫除再入相

制曰三台宣符色齊明而星度正二氣播物和咸感而歲功成廼眷耆賢夙居揆路屬懇辭之存至式邁其行

逮疑謗之洞開使復其位敷予有命告爾在庭

具官曾懷端

重而無華寬容而有裕學探古今之蘊氣涵天地之全才略濟繁更百為而彌劭智謀經遠周萬變以皆通蚤

簡深知歷敷要任有績咸又靡勤弗宣迄登政地之庸
旋正宰司之位從容調娛而協時幾之會造次啟沃而
陳久大之圖心休休而善容猶翼翼以祗畏還觀忠實
益厚倚毗嘉宏業之方隆駭流言之不靖爰狗告歸之
請俾從均秩之私朕廣開至正之門茂建大中之極考
昔君臣之相遇允繫於同心維時上下之弗交亦先於
除間肆詳加於審覈已備見於昭明又缺我斯念稍違
於近輔疇若予采恐寢隳於前規是用誕錫恩章趣還

鼎席總領繁機之要變諧大化之元具袞衣而迎周公
庶率循於往訓啟延英而待裴度已欽佇於嘉猷仍進
文階併增井賦是為殊寵直穆輿情於戲無競維人有
孚在道日月照矣茲盡釋於嫌猜股肱良哉宜力圖於
報効尚堅素節永翊丕基

崔敦詩詞

先是臺臣詹亢宗季崇論李杓王宗已因中懷懷
遂求退且乞辨明誣謗續棘寺根究無實乃貶責
亢宗及崇而復相懷

七月己未張說罷知樞密院事

太尉提舉隆興府玉隆觀依前安慶軍節度使

制曰幹樞極以居中夙任本兵之寄視政塗而疏寵峻

升掌武之階惟時左右之良積有勤勞之助茲遽祈於

均逸宜申錫於茂恩

具官張說

性稟裕和才資通敏深詩閔

禮嘗折節以好修趨事赴功思飭躬而自勵蚤被慈皇

之眷晉司上閤之嚴暨予纂紹於慶基俾爾繼承於密

旨謂踐敷之滋久當信謹而不渝分閭龍舒既陟建旄

之貴運籌虎幄復資借飭之謀朕方愛日以有為厲精

而更化念歲陰之屢改亦班序之浸高循名實以責成
冀勲庸之亟就何乃奏封之上願從散地之安佩金印
以名官有華其秩即琳宮而曳組式憩爾勞禮遇所加
始終無負於戲惟名與器朕固戒假人之私既哲且明
爾尚迪保身之道既祇猷訓永稱寵榮

說自乾道八年二月除簽書樞密院事九年正月
除同知樞密院事十月除知樞密院事是年七月
罷在樞府凡二年餘其後臣僚論太尉安慶軍節

度使張說欺君之罪降充明州觀察使撫州居住

同日楊倓簽書樞密院事

自昭慶軍節度使
提舉佑神觀除

倓初授昭慶軍節度使依前提舉佑神觀制曰奉祠官而均逸久叅儒職之華開將閫以展容蓋示恩章之異眷惟禁路時有俊臣推予褒賞之能作爾功名之會誕揚丕冊孚告大廷

具官
楊倓

渾厚而雄深方嚴而肅括忠義

由於世濟通明稟於天資才略應繁刃發硎而有裕智謀周變龜獻兆以無遺歷更事任之宜積著功勞之盛逮司

國用具觀運理之長旋卽里居深見靖共之譽茲被張旌
之遣曾無引道之艱是用申錫恩綸優加茂典建齋壇而
授節撫瓊管以殿藩明庶以功實參圖於素効克紹乃辟
尚追繼於前規仍從仙館之遊復啟侯封之寵陪敷采邑
增衍真畬於戲治匪異途材難具美文武維憲爰得亮邦
之賢威儀則多是昭馭貴之體克祗厥訓益固乃猷

崔敦詩詞

俠字子靖代州崞縣人紹興大將存中之子也中
進士第

十一月戊戌龔茂良叅知政事

自禮部侍郎龔權吏部尚書除

茂良字實之世爲錢塘人六世祖避錢氏之亂遂家於莆甲辰輔臣內殿奏事畢賜坐上顧葉衡龔茂良曰兩參政皆公議所與衡等起謝

丙午曾懷罷右丞相

除觀文殿大學士提舉洞霄宮依前光祿大夫

制曰經體贊元夙展弼諧之效辭榮避寵宜加禮遇之隆眷

時耆英司我宰柄屢控丐閑之請爰推均佚之仁申錫徽

章誕敷渙號

具官曾懷

端莊而有守和易而不流孝自家傳

承三朝之相業才周世用通萬貨之利源朕以其休休
有容物之心惓惓得愛君之誼付之以政庸究爾能調娛百度而
各適於中登進庶僚而不失其序譎張並作當風波可畏之
塗履尚素闕凜松柏後凋之節載還廊廟獨秉鈞衡方夙夜
之仰成俄晦明之爽節爰許小車之駕仍勤便殿之咨任蓋猶
於股肱禮豈求於筋力而闕興歸志存貢忱辭雖神明所扶顧
何恙而不已起居惟適重以事而憫勞其聽解於繁機用
申褒於異數延恩通籍冠學士之穹班大綈領祠憇洞天

之真境式昭體貌俾遂燕頤以旌勇退之高以表服勤之久於戲若時奮庸熙帝載既膺宅揆之圖罔以寵利居成功斯盡保身之哲往綏壽嘏允迪令猷

王淮詞

懷自是年七月復拜右丞相是月罷再入相四月懷以疾自請故有是命十二月懷以違制差過員數最多降充觀文殿學士尋以觀文殿大學士光祿大夫致仕贈少保十三年閏七月詔故宰相曾懷落觀文殿大學士以變賣恩澤故也

同日葉衡右丞相

自兼樞密使叅知政事遷通奉大夫除

制曰聖人以道觀能職莫先於論相儒者在朝行政任

尤重於經邦朕憂勤日攬於萬機贊襄允賴於一德疇

若弼諧之命肆登叅預之英揆以剛辰敷時渙號

具官葉衡

才猷敏邵智略通明素蘊胸中有致主澤民之學若陳

掌上皆富國強兵之謀策高足而據要津遇盤根而知

利器出分制閫屢宣填拊之勞入履禁塗綽著論思之

益粵陞樞筦遂翊化元予欲旌廉汝則擇人而公薦予

欲久任汝能抗疏以歷陳事每契於時宜志密毗於王
度言念奮庸之久愈深注意之誠若建厦待汝為棟梁
若濟川待汝為舟楫屬袞闕之當補惟岩瞻之具依是
用延登宰路之崇兼總籌帷之運超三階而進秩增煥
曩章冠五等以疏封式昭異數仍衍圭腴之入以彰物
采之華於戲熙帝載而亮天功務罄彌綸之効領衆職
而稱朕意毋忘綜核之規其悉乃心同底于治

是月楊傑罷簽書樞密院事

以昭慶軍節度使知荆南府

僕在樞府三月餘出知荊南府後再知江陵府右
正言葛邲論其罪提舉王隆萬壽觀八年三月卒
遺表有旨贈太尉

十二月丁巳李彥穎端明殿學士簽書樞密院事

自吏部尚

書魚太子詹事魚侍讀除

彥穎字秀叔雪川人

淳熙二年

乙未

五月沈復同知樞密院事

自資政殿大學士中大夫四川宣撫使除

九月乙未葉衡罷右丞相

依前中奉大夫知建寧府

衡自淳熙元年十一月拜右相是年九月罷入相

凡十月○右司諫湯邦彥論右丞相葉衡惟務險

愼以為身謀變亂是非遂有此命言者不已遂併

建寧罷之三年二月責授散官郴州安置六年八

月詔責授安德軍節度副使葉衡久在謫籍淳經

恩霈特與叙復中大夫在外宮觀十年四月詔復

通議大夫依前提舉洞霄宮從吏部檢舉也五月

卒贈資政殿學士依條與致仕遺表恩澤

閏九月丁未沈復罷同知樞密院事

知鎮江府

四年五月自資政殿大學士中大夫知鎮江府改

知福州以太中大夫致仕十三年六月賜謚曰簡

肅以其子承奉郎炳請也

丁巳李彥穎叅知政事

自端明殿學士簽書樞密院事除

王淮端明殿學士簽書樞密院事

自翰林學士知制誥除

淮字季海金華人

淳熙三年

丙申

七月王淮叅知政事

自中大夫同知樞密院事除

六月丁丑龔茂良罷叅知政事

除資政殿學士知鎮江府

茂良自淳熙元年十一月叅知政事是年六月罷執

政二年餘○曾覲與茂良爭使相奏補法一日退朝

覲當道不避茂良翼日奏白上前曰臣固不足道所

惜者朝廷大體耳上遣中使諭覲詣政府謝茂良取

其直省官撻之御筆宣問施行太遽茂良抗章待罪

六月茂良求去益力內批除資政殿學士知鎮江府奏
乞謝辭詔令內殿奏事手疏六事論恢復之具曰天意
曰人事曰財賦曰將帥而所以用之者曰謀曰時既退
臣僚論茂良擅權植黨上親洒宸翰諭以體貌大臣之
意再上落職罷七月臣僚復論茂良四罪言茂良行
丞相事首尾三年屢對賓客廣座肆言茂良以智名
勇功爲戒凡遇臣僚奏對有及邊備利害必遭譏罵
陛辭之日具疏方有所論凡數百言此可誅一也云

云尋責授寧遠軍節度副使英州安置明年卒於貶所得旨歸葬十年追復通奉大夫十一月詔特與致仕恩澤二名遺表一名十五年追復資政殿學士

十一月庚子趙雄同知樞密院事

自簽書樞密院除

淳熙五年

戊戌

三月李彥穎罷叅知政事

自通議大夫除資政殿學士知紹興府

彥穎自淳熙元年十二月除簽書樞密院事二年閏九月除叅知政事是年三月罷執政三年餘彥

穎以久贊機政奉身丐閑故有是除

壬子史浩右丞相

自觀文殿大學士充醴泉觀使兼侍讀永國公依前少保授右丞相進封

衛國公

再入相

制曰朕儀圖俊傑勲相邦家受命溥將協濟藝祖興王之業治民祇懼共恢光堯復古之勲念弄印者累年嘗命龜而載卜人惟求舊既朕志之素孚民具爾瞻亦物情之衆允渙以大號揚于外朝

具官史浩

道廣而智周才宏

而德備經綸之蘊蚤自許於功名寬裕之懷時莫窺其

器量東學翼天飛之運中階符帝賚之祥自弼亮於初
元即宣昭於美業敬王如孟子非仁義不陳於前告后
若君陳有謀猷乃順于外方叅和於鼎飪旋力解於機
衡比趣召環進陪經幄姬公邁返初無四國之言裴度
求歸尚使兩河之畏屬宵旰厲精之日適辨章虛席之
時宜續前功再膺大任易零陵之舊壤啟淇水之新封
增衍土田併隆體貌惟任之不輕則望之彌重惟始之
不易則終之實難予其仰成人且觀政於戲兆姓輯於

下然後可以調陰陽四維張於朝然後可以正法度堅

忠實之志則

闕

不革絕親黨之私則除授罔不公

使奠枕如淳化端拱之間而迂衡如至和皇祐之際庶
益光於舊學斯無負於殊知

公既再相孝宗曰自葉衡罷虛位以待丞相久矣
與執政入謝德壽宮高宗曰卿再入相天下之幸
也

行狀

四月丙寅范成大叅知政事

自禮部尚書兼直學士院遷中大夫除

成大字致能吳郡人

六月乙酉錢良臣端明殿學士簽書樞密院事

自給事中除

良臣字友魏嘉興華亭人

甲戌范成大罷叅知政事

除資政殿學士知婺州

成大自是年四月除叅知政事是月罷執政僅兩

月御史疏論成大請以本官奉祠詔從之七年二

月起知明州八年二月除端明殿學士三月改帥

江東兼行宮留守十年八月乞宮觀輔臣進呈上

曰成大歷典大藩備著勞效可除資政殿學士提
舉洞霄宮光宗即位下求言之詔詔曰卿以文章
德行師表縉紳受知聖父致位丞弼均佚方面乃
心王室於天下事講之熟矣其悉意以陳以副朕
傾想之意紹熙三年加大學士四年九月薨官至
通議大夫贈銀青光祿大夫

已未王淮知樞密院事

自叅知
政事除

趙雄叅知政事

自同知樞
密院事除

十一月甲戌史浩罷右丞相

授少傅保寧軍節度充醴泉觀使兼侍讀依前衛國

公

制曰一相勤勞處內既懷均佚之心三孤德義輔予斯厚優賢之禮眷言宿望懇避繁機誕推從欲之仁顯布告廷之命

具官史浩

恭寬敏惠明允篤誠浹萬事之周材見

諸施設貫六經之要道發以詞章會風雲於潛躍之中翊日月於照臨之始變調元化經綸之譽孔昭寧輯黎民屏翰之功亦著粵從再相浸閱三時邦彛循清淨之

規王度嚮粹夷之美方深注意其底迂衡廼薦控於表
誠殊弗居於寵利囊封莫過陟典難稽希冕冢車進新
班於亞傳雕戈錫盾還舊節於東陽表儀虎觀之儒先
燕息祥源之使領拓其奉邑衍以真禽音昌朝敷皇祐
之經創班聯於祕殿而公亮釋熙寧之政兼將相於內
祠茲參兩朝優異之恩庸作一代耆英之寵於戲仲山
甫既明且哲夙高補袞之勲房玄齡善始以終寧復吝
權之意夫已遠一日萬幾之不務則將聞二帝三王之

昌言謀焉就之遐不謂矣

浩自是年三月拜右丞相是月罷在相位八閱月
○十月諸軍以多闕額又有逃亡請得自招捕許
之而並緣強取被略者或至斷指以求免都下洵
洵公飛奏盡釋所捕又擒為首者送棘寺宣華宰
輔等議罪欲取兵民各一人梟首以徇公謂未得
其平兵士可斬百姓陸慶童當坐流罪上怒不以
為然公曰陛下恐軍人有語而以百姓為可欺耶

爭之益力上愈怒公議罪如初遂求去位除少傅
保寧軍節度使充醴泉觀使兼侍讀後有言慶童
之寃者孝宗曰史浩蓋嘗力爭坐此求去至今悔
之賜第城中出御制長春花酒詩酬和至再以示
眷留之意公屢求歸時陳俊卿已奉祠八年二月
除判建康府公奏俊卿年未七十而求去臣以七
十有六而往豈不愧見吏民邪依舊在京宮觀兼
侍讀孝宗嘗自擬館職策極言取士用人之弊大

要謂國朝過於忠厚以示公公讀畢奏曰太宗不忍殺一不辜以得天下累朝仁德至仁宗而大備夫忠厚豈有過耶孝宗曰非卿不能為此言五月始許歸除少師進封魯國公

制曰出處人臣之大致世難名節之全爵齒天下之達尊國繫典刑之重眷言元老留處內祠茲具諭於誠衷願即歸於田里用錫爾祉式邁其行

具官史浩

才巨而識明

德全而行備履常無競恂恂忠厚之風樂善有容渾渾

沉深之度委釋經綸之任從容閒燕之談神明未衰於
前賜問相望於道方深厚遇遽起冲懷叩黼座以攄辭
疊囊書而瀝請自陳歲月之邁必丐山林之安承晝接
之親每闕嘉猷而啟沃引夜行之戒乃思高蹈以全榮
念感會之有初閱老成之無幾朝批章而太息暮覽奏
以長思重違乃情圖畀厥寵是用渙揚茂命聽便故鄉
殫轂超朝進亞師之服位龜蒙莫壤開廣魯之山川衍
以新畬仍其舊節惟名與器俾壽而昌於戲敷求前聞

優待耆德皇祐之詔三老設几以須熙寧之遇四臣賁書而訪尚有斯禮勿遐爾心

十年少師史浩請老除太保致仕公嘗歷永衛魯三國公於是進封於魏仍令如曾公亮例入謝明年先降旨候至國門百官郊迎見畢對御賜宴用文彥博故事道中具辭再三奉俞音乃絕公晚治第西湖之左哀兩朝所賜御書建閣以處之因奏聞孝宗書明良慶會之閣以賜公謝不敢當孝宗

曰古人願為良臣卿輔朕之久日聞忠言深悟朕
心尚何慊乎勅後苑造扁榜命中使馳賜之上嘗
以舊學二字即政事堂賜公同列咸曰自古際遇
莫盛於此請饒諸石為省中榮觀公又謝不敢既
歸以名其堂歲遇誕日錫以金器者十四年年八
十又加寶器兩宮使命相望高宗再舉慶典詔公
隨班上壽進太傅賜玉帶金魚踰月乃東公自五
年十一月罷相仍侍經筵八年告歸得請一再召

見恩賚深渥每以老先生呼之

行狀

十年六月浩以

太保保寧軍節度使魏國公致仕

丁丑趙雄右丞相

自叅知政事遷
正議大夫除

制曰朕紹天休運持國永圖內懷未究之規幕外愧難
成之功業長撫遠馭將恢不世之基深識通材庶獲非
常之輔有赫延登之命無逾歷試之賢具宣乃猶咸告
爾衆具官趙雄器全而用遠實大而聲聞臨事謀端闕若元
龜之信當機立發沛如流水之源密膺深知亟踐要路

考其才恢恢而有餘地驗其策斷斷而無空言灼知俊

心可倚大任遂付以政用宏乃庸周旋三時醇

闕

一節

以智略通明贊朕事以道德寬大廣朕心民言維嘉國
論以壹朕敷聞古昔注想英賢以言寤念則曷究於深
誠以象營求則固非於素望念此選舉疲於夙宵有能
奮庸協我昌明之會曾是在位得茲碩大之臣是用誕
敷恩綸登授相柄廣宣厥道俾盡展於良規無棄爾成
尚乞終於顯績申加采邑超進文階並出眷懷是崇體

貌亶茲注意維以蒙休於戲邃古之治益遙真儒之效
浸寡維身克正卿士庶尹無不宜維心克誠陰陽四時
無不序勉攄素蘊永底丕平

七年十二月以脩史書成自宣奉大夫授銀青光
祿大夫依前右丞相進封沂國公

同日王淮樞密院使

自知樞密院事
遷中大夫除

制曰象著三辰斗極上通於帝紀政分二柄機庭內總
於兵權朕振長策以御邦綜大綱而撫世永惟軍國之

任並繫安危之圖茲有良臣久司右府既協同於人望

亦灼見於朕心遂升班聯授乃重寄消以吉旦諭於羣

倫

具官
王淮

剛正而守中高明而持重質諸天地言顧行以

無慙欲自朝廷實浮名而有裕曩踐政路歷宣賢勞調

娛萬幾綏靖四國逮進登於宥密益具罄於忠嘉尊俎

之畫消難於未形帷幄之言進規於不逮事必汝訪謀

無予欺邦其尊榮民以寧壹朕叅稽古誼簡畀事權勃

輔漢家實倚本兵之重蠡謀越國亦專主外之長是用

誕頒恩書升正使號式序爾位亞端揆以同登克壯其
猶秉神樞而獨制仍陪戶邑併陟文階是由至懷庶表
優禮於戲賢人之業可大副予體貌之崇天下之務惟
幾藉爾精神之運勉堅一意汔底多盤

七年十二月以脩史書成自通奉大夫授正議大

夫依前樞密使進封信國公

乙亥錢良臣叅知政事

自簽書樞密院事除

淳熙七年

庚子

五月戊辰周必大叅知政事

自吏部
尚書除

謝廓然端明殿學士簽書樞密院事

自刑部
尚書除

必大字洪道吉州人廓然字

闕

人

淳熙八年

辛丑

八月趙雄罷右丞相

自銀青光祿大夫沂國公除觀文
殿大學士四川安撫制置使兼知成

都
府

制曰朕推誠宰路興治邦圖專任而倚成功方賴謀謨
之益勞謙而迪終吉迄難志願之違疇異數以寵行擇

巨藩而命鎮消以穀旦告於治朝

具官趙雄

材鉅而識高氣

全而量遠光明碩大皇皇人物之宗廣博靖深渾渾廟

堂之器登進端揆敷宣大猷薦才常采於公言立政悉

循於直道國論咸穆輿情具宜遽覽封章願辭機務方

仰成之無間豈引去之當言細札溫詞已示曲留之意

高情亮節愈堅勇退之心簡於深懷厚以殊遇眷惟蜀

道實重益都綜張箕舒翼之營控歷井捫參之勢既資

君重壯方面之金湯仍使公歸耀故鄉之袞繡更超加

於儒職庸增重於民瞻茂著忠勞具昭眷禮於戲唐姚
崇之相適俱及於三年周申甫之賢亦于蕃於四國尚
膺休命益懋顯庸

雄自淳熙五年十一月拜右丞相是年八月罷入
相二年餘時有言雄多私里黨者於是命大臣進
擬皆於姓名下注本貫封入遂為故事十年自知
廬州知江陵府十四年十月除特進判江陵光宗
即位下求言之詔詔曰卿以碩德重望受知聖皇

輔政典藩綽有成績已頒召節俾遙闕庭入告嘉
猷行盡對敷之益星言夙駕勿辭跋履之勞予欲
亟間切直之規卿其深體傾渴之意凡軍國之利
害生民之休戚悉宜條陳先以驛奏自餘忠益尚
冀面求四月特進觀文殿大學士判江陵府荆湖
北路安撫使沂國公趙雄奏先准聖旨令赴行在
奏事尋具奏懇免仍乞外祠蒙降詔不允依已降
指揮疾速前來者乞追寢前命詔可特轉一官依

舊判江陵府閏五月特受寧武軍節度使開府儀
同三司判江陵府進封衛國公紹熙元年六月詔

判潼川府趙雄依所乞克醴泉觀使

始封沂
後封衛

王淮右丞相

自樞密使信國公除光祿大
夫兼樞密使進封福國公

制曰人主論一相紀綱舉則庶績熙上賢為三公儒術
行則大治起朕選建哲輔協圖康功夜夢想以營求朝
咨諏而博采帝賚予弼夙推成德之良民具爾瞻茲屬
已然之效渙此休命告於朝廷

具官
王淮

亮直而渾深清明

而篤實以貫通三極之學發於宏毅之資以運理萬物之才行以安和之度更踐政路勤施王家奮明略以憲邦抱純誠而事上逮冠宥府益聞嘉猷辭氣從容幄中之畫已定精神孚達天下之患自消泯功用於不言贊謀猷於獨運朕勵精求治望古興懷皇天付予以生民念當躋於富厚太上授予以丕業思盡復於升平撫歲月以浩然履基圖而惕若疇若予采適求厥寧是用酌於師虞畀以宰柄崇於體貌既超漢爵之階徹彼山川

仍奠閩邦之壤因念安危之寄固難文武之分俾兼元
樞遂合大政具昭眷倚茂輯勲庸於戲歷考帝王之盛
朝永懷臣主之亨會譬諸脩漢爾其為羽翼以遊喻彼
洪荒爾其為舟楫以濟尚膺懋典益究洪圖

甲寅謝廓然同知樞密院事

九月兼權
叅知政事

九月庚寅錢良臣罷叅知政事

除資政殿學
士在外宮觀

良臣自淳熙五年六月除簽書樞密事十一月除
叅知政事是年九月罷執政凡三年餘十年三月

詔正奉大夫知鎮江府錢良臣治郡踰年職事脩
舉可除端明殿學士依舊知鎮江府十二年正月
知建康府兼行宮留守錢良臣除資政殿學士十
四年八月良臣在建康府已四年以方面難得人
除資政殿大學士依舊知建康十五年八月提舉
洞霄宮從其請也光宗即位下求言之詔詔曰卿
二府舊臣宣力滋多壽皇之所擢任而冲人之所
注想者也嘉謨嘉猷奚必咨問而後樂告哉實賴

歲規以毗初政十六年十一月卒積官宣奉大夫
贈金紫光祿大夫謚文惠孝宗嘗詢時事所陳合
上意孝宗褒之曰如卿真所謂通世務之儒遂書
通儒以賜之上在春宮又書雲漢昭回之閣以賜
之

淳熙九年

壬寅

六月丁巳同知樞密院事謝廓然致仕

廓然自淳熙七年五月除簽書樞密院事八年八

月除同知樞密院事至是年六月以中大夫守本官職致仕在樞府二年餘是月戊午卒贈光祿大夫資政殿學士

七月壬辰李彥穎罷叅知政事

自通議大夫依舊資政殿學士提舉洞霄宮

彥穎以疾乞解機政故有是命十年正月右諫議大夫張大經論叅政李彥穎不能治家體國乞罷資政殿學士詔特降為中大夫光宗即位下求言之詔詔曰卿精忠粹德士林之冠冕嘉謨碩畫今

代之著蔡膺聖父之圖任助冲人之緝熙養浩家居心在王室軍國之務至熟悉也朕不忘卿卿其肯忘朕乎其悉條上以副眷想七月詔資政殿大學士左正奉大夫提舉洞霄宮李彥穎久在潛藩老成靜退可除觀文殿學士依舊宮觀是月臣僚奏今自宰相執政侍從卿監正朝郎貲郎分為五等除致仕遺表已行集議裁減外今將逐郊蔭補恩澤每等降殺以兩酌中定為正數宰相一十人

開府已上同執政八人太尉同侍從六人詔從之

九月庚午王淮左丞相

自右丞相兼樞密使福國公加特進封冀國公

梁克家右丞相

自觀文殿學士醴泉觀使兼侍讀遷金紫光祿大夫進封儀國公

淮左丞相制曰朕適廣燕謀紹開駿命內則振大綱而

總核外則揆長策而經營天堦我成功將盡復祖宗之

緒帝賚予良弼方并持文武之權疇首贊於廟謨肆丕

敷於廷號

具官王淮

擴先覺之蘊挺大受之姿約六經而成

文才獨高於黼黻兼三王而施事學自富於經綸似不

能言而智足以決天下之疑如不勝衣而勇足以任天下之重夙簡登庸之望存疇開濟之圖時最久於輔庭功尤多於宥密逮居百揆彌變萬機揚協帝之重華輯效君之衆美謙恭率下德乃大而有容諒直處中誠則久而無息除吏靡私於親故振民請惠於困窮問邊備則邊人棄犀甲而歸問師律則將帥厲虎臣之氣是用繇右弼而陞左輔益聳於具瞻顯東府而解西樞復循於彞典蓋建隆之初造與慶歷之既平除授具存規模

可考茲仍分於二柄肆稽合於兩朝啟南國而冠崇階
疏多奮而行真賦以章廉陞九級之遠以顯泰符三階
之平予欲格天和陰陽以爾為璣衡而齊七政予欲導
民厚風俗以爾為卜筮而孚四方予欲董正臣工爾其
總於衆職予欲救寧方夏爾其斷於大謀尚光續於前
功庶永垂於令問

克家右丞相制曰朕躬覽皇綱力恢聖緒以繩武則遠
邁藝祖一定之策以繼志則近守慈皇再造之模天祐

生賢早出扶於熙運人惟求舊復登庸於繁機朝無間
言國有成命消辰斯吉渙號其孚

具官梁克家

道公靜而邃

深德寬博而闕大東南盛溫厚之氣蓋稟其全英俊陳
治平之原嘗居其首碩望徧儀於華要瑰才亟贊於機
微逮進秉於化鈞果深裨於治體百僚是式方疇董正
之功四國于蕃薦省阜成之化外則教條班于侯服內
則福潤蒙於帝都民言維嘉賢業以大緬懷故相參考
本朝在明道則有李迪之重來在景祐則有王曾之再

入皆褒然之舉首兼籍之盛名袞繡遄歸廟堂增重是用召自長樂寘于邇英眷精神之益強肆體貌之加渥祥應於上象復正於登三績著於前講尚存於畫一盛揆天人之意具咨邦國之謀式副巖瞻亟存柄任俾緝熙於帝載以對亮於天功如益稷之同謨如周召之並相超文階之異等進名壤之新封載衍多畝陪疏真采庶幾今日之治復似仁皇之時於戲不得臯陶為舜之憂朕既圖於舊德罔俾阿衡專商之美爾尚迪於前彛

必使萬物皆已得宜以至四方罔不咸賴庶前功之不替則廣譽之無窮

同日周必大知樞密院事

自叅知政事同提舉
詳定一司敕令除

十二月丁丑施師點端明殿學士簽書樞密院事

自朝請大

夫給事中兼太子詹事十年
正月丙戌兼權叅知政事

師點字聖與其先世雪川人五季時徙家上饒嘗假翰林院學士克金國賀正旦使致命金庭立班既定儀者以親王將至命師點退一位師點屹然

不動相儀者復

闕

師點正色曰班立已定尚

何為久之終不徙步班列相目駭愕知師點有守

也使還復命有聞於上上嘉歎不已後賀正旦金

使至闕問館伴以師點今居何官師點立班館伴

宇文价目示之金使曰一見正人令人眼明正月

除端明殿學士簽書樞密院事入奏控免上曰卿

靖重有守識慮深遠朕欲擢用久矣復詔兼知叅

政

淳熙十年 癸卯

八月戊申施師點叅知政事兼同知樞密院事

自端明殿學士

簽書樞密院事兼權叅知政事遷中大夫除

師點嘗同宰臣奏事退復同知樞密周必大進呈
上曰適來一二事卿等各陳所見甚得朝廷大體
前此宰相奏事執政不措辭今卿等如此深副所
望必大深奏曰祖宗時宰執奏事自相可否或至
面相切責退亦不相銜自秦檜用事執政畏避不

敢言今陛下虛心兼聽若只宰相奏事何用執政
為師黜復奏曰臣蒙陛下擢用自愧素餐疊蒙聖
訓敢不竭股肱之力時州郡上供嘗有立歲終比
較之法者及是主計之臣好為督趣以露已功乞
不待歲終先期行之晝命下師黜曰此策若行諸
司州郡文移稠疊上下逼迫姦吏舞文病民民不
聊生力陳其故或謂令已出師黜曰事有為天下
病惟恨更之不速即追寢其議請者聞師黜言益

內媿周必大舉手賀師點曰使天下赤子不被其毒者公之賜也閏月辭兼同知

黃洽叅知政事

自御史中丞兼侍講遷中大夫除

洽字德潤福州人

淳熙十一年

甲辰

六月庚申周必大樞密使

自知樞密院事除

必大辭樞密使劄子臣竊觀本朝故事機庭置長或使或知蓋因人才之優劣別資望之輕重元豐

肇新官制始刊使名雖有聖諭實惜之也自是四十餘年莫之或改建炎紹興間二揆嘗司兵柄亦不過曰兼知院事而已尋因舊相名還復令充使以示優禮其後或勲舊官至公孤或終賢名重帷幄間有除授而非積歲月之勞所能至也伏望姑仍舊次亟免新綸批答曰卿名世瓌才經邦茂業踐脩端直識詣高闕越自疑丞進司機要夙宵匪懈中外以寧又曰國家建右府以總戎昭命儒臣

而崇使領蓋自太平興國以來成憲具在迄在于
今茲必以閎才碩學見聞殫洽者任之豈非兼文
武之用明政事之體乎卿博通古今德茂先覺發
為謀謨足以斷國論措諸事業足以恢政經夙被
簡知延登樞近遠猷碩畫宏益居多乃疇已試之
庸申峻久虛之職蓋將資精神之運懋勲烈之隆
使八荒咸賓萬邦底乂茲為美報安事固辭

淳熙十三年

丙午

閏七月戊申留正端明殿學士簽書樞密院事

自敷文閣學士

除

正字仲至泉州人

十一月丙寅梁克家罷右丞相

觀文殿大學士克醴泉觀使兼侍讀依前特進

鄭國公

制曰具瞻而秉國鈞久賴經邦之輔移病而歸相印肆宏就第之恩矜予廟社之英斬解機衡之重中盼明命

賁告昕廷

具官梁克家

敦厚而直溫忱恂而簡亮褒為舉首

貴名早壓於紳綏灼見俊心瓌望允隆於耆老自載儀
於大柄益增耀於中台處躬如權石之平宰物驗著龜
之決陰陽變理百穀用成良俊登崇九功惟叙覽觀事
業踰前後之數公典領策書究春秋之五傳方履浸昌
之會適罹無妄之災暫云偃息以在床未與進為而撫
世遽陳懇款規即退藏留行屢飭於訓辭勇去莫回於
雅志庸稽故實加貴宗工即學士之大稱仍文階之極
品珍臺間館獨冠舉伊之倫魁廣廈細旃上論唐虞之

盛際式昭朕意曲便爾私於戲有榮觀而燕處超然既
閱勞於官職俾純嘏而第祿康矣更入告於謀猷佇聞
樂喜之亨尚迪棟隆之吉

克家自淳熙九年九月拜右丞相是年十一月罷
再入相四年餘詔史浩舊第令梁克家居止明年

夏卒謚文靖

初封儀
後封鄭

淳熙十四年

二月丁亥周必大右丞相

自樞密使遷
光祿大夫除

制曰分政柄於東西久重樞庭之任咨廟謨於左右並
崇宰路之瞻廼睠鴻儒寔嚴命宥越自本兵之長進登
次相之尊爰告昕朝式敷坦制

具官周
必大

行醇而守正識

茂而慮周經綸包萬變之微綜彙洞群言之奧修身有
道審觀君子之樞機正色在朝稔著賢人之德業運帷
籌於密勿增國體於安彊天下之務惟幾深究英謀之
秘儒者之效已試寔更歲華之多茲疇弼直之良務簡
忠勞之最熙帝之載禮特厚於奮庸代天之工識敢輕

於理物匪資碩望孰懋宏猷儀圖爾能夾輔予治乾台
彪烈象益炳於六符廟鉉變和勢更隆於九鼎峻陟文
階之秩申開采邑之封稽于僉諧萃此徽渥於戲唐虞
建官之制莫先百揆之司周召作輔之勲實出群賢之
表予欲上參於盛際汝其遠紹於前脩陰陽調則庶類
遂其宜刑政清則蒸民樂其業內俾紀綱之尤振外臻
疆宇之永寧咸思翊贊之方庸體倚毗之意尚恢績用
奚俟訓詞

十五年九月右丞相周必大進封濟國公以明堂
禮成加恩也

戊子施師點知樞密院事

自叅知
政事除

師點惓惓搜訪人才手書置輦囊中謂蜀去朝廷
遠人才難自見師點即蜀士之賢者俾各疏所知
差次其才行學文得之每詳或有除授必列陳之
一日薦胡晉臣上曰已用為監司矣師點曰晉臣
宜置之內為闕上為召入及對上稱其才師點曰

以臣觀之廊廟器也後至大用

八月癸未留正叅知政事兼同知樞密院事

自簽書樞密院事除

明堂進封制曰

具官留正

蚤歷禁嚴之地屢更岳牧之司實

修於已而泯然忘名仁根所性而動則有勇入佐鈞樞之務肇新軍國之容康濟率自中具孚人望謀猷告于內摠合朕心

淳熙十五年

戊申

正月庚申施師黜罷知樞密院事

除資政殿大學士知泉州

師點自淳熙九年十二月除簽書樞密院事十年
八月除叅知政事十四年二月除知樞密院事是
年正月罷執政凡五年繼除提舉洞霄宮光宗即
位下求言之詔詔曰卿乃壽星之元樞而冲人之
舊學也處心平而持論正更事多而慮患遠去國
未久豈能遂忘朝廷乎凡事之有關於軍國而有
益於初政其啟告朕諒卿忠盡必體至懷紹熙二
年除知隆興府三年二月薨年六十九五月贈故

資政殿大學士正奉大夫致仕施師點金紫光祿

大夫

甲子黃洽知樞密院事

自叅知政事除

蕭燧叅知政事

自吏部尚書除十六年正月兼權知樞密院事

洽明堂進封制曰朕若昔大猷三舉宗祈之典相予肆

祀五分使範之聯

具官黃洽

器大而聲宏任重而道遠淵乎

見叔度之量忠矣識子文之心伏青蒲則木正於從繩

抗白簡則雪消於見覲進聞邦政有溫良恭儉之風默

運帷籌無智名勇功之迹

云

燧明堂進封制曰

具官蕭燧

出藩於外則悃悃無華入侍於

內則溫恭有恪六卿分職獨高禁近之班四輔惟人遂
正疑丞之位名實既加於上下老成亦重於典刑

燧字照隣臨江人既貳大政權監修國史日歷明
年兼權知樞密院事孝宗深知之初為諫議大夫
入謝上曰卿議論鯁切不求名譽糾正姦邪不恤
讐怨又每稱其全護善類誠實不欺他日大臣奏

事上語曰蕭燧其人質直無緣飾御書二十八將傳論以賜最後去樞府辭日上復有勉從卿去之語其為孝宗信遇如此

五月己亥王淮罷左僕射

除觀文殿大學士判衢州兼管內勸農使依前特進魯國

公

制曰輔贊而藏諸用首殫經治之勤明哲以保其身特厚殿邦之渥眷時元老久正上台首祈解於機衡肆優加於體貌誕申渙號敷告公朝

具官王淮

醇懿粹和洪深端

靜包舉衆善而得其正調娛官度而歸於中自持魁柄
之崇深極巖瞻之峻祇承王命居啟沃以為忠表倡民
區雅阜成之是務載念歲時之積具知夙夜之勞惟肱
股分治於四方且垣翰間謀於三事等重輕而注意參
內外以考功廼擇郡符實連鄉社上丞相之綬姑狗沖
懷視太守之章勉綏雅俗躡殿廬之華貫侈學士之大
名是為儒者之榮允答政塗之瘁於戲御臣以禮尚留
近地之咨論相惟難深惜舊人之去往欽寵數益茂顯

猷

淮自八年八月拜右丞相九年九月拜左丞相是
年五月罷入相六年餘六月甲寅朔詔新判衢州
王淮提舉洞霄宮從其請也光宗即位下求言之
詔詔曰卿曩以經術羽翼朕躬以德業股肱聖父
周旋政地十有四年凡國家之利害生民之休戚
與夫政事因革損益之宜知之詳而見之熟矣有
可以裨朕者其悉以告朕將受而行之庶資忠規

以副虛佇八月詔王淮除少保依前觀文殿大學士致仕九月贈少師

淳熙十六年

巳酉

正月丙申黃洽罷知樞密院事

資政殿大學士知隆興府

洽自淳熙十年八月除叅知政事十五年正月除

知樞密院事是年正月罷執政五年餘光宗即位

下求言之詔詔曰卿以學儒之彥被遇聖父圖任

共政績用章明均佚价藩去國未久以卿之素蘊

有可為初政之助者其悉以聞此朕之所注想於卿而卿之所輸誠而樂告者也紹熙元年十月以通議大夫提舉洞霄宮

已亥周必大左丞相

自右丞相濟國公除特進進封許國公

留正右丞相

自叅知政事兼同知樞密院事遷通奉大夫除

必大左丞相制曰帝咨百揆以亮功蓋取衆賢之協王命六官而分職莫如冢宰之尊朕稽述洪猷儀圖俊德曠弼諧於政體俾登冠於台司誕布明綸格于公聽具官

周必大
道推先覺行迪大儒秉直方之氣而濟以疏通之

才廓高遠之識而輔以醇正之學瞭若著龜之兆理灼
見於古今確然金石之姿節靡渝於夙夜踐更二府酬
酢萬機自進秉於國鈞廼備宣於賢韞謀謨乎上足以
康庶事表厲乎下足以正群工陰陽理而物遂其宜社
稷安而國蒙其利比繇顓任期以首公望深峻於中朝
位宜崇於上相紫綬金印之寵即廊闕以不移黃耳金
鉉之虛與泰符而增煥褒敷斯至倚屬匪輕政已治則

尤務於調娛勢已安則當思於振飭肆華資之超進仍
名秩之序陞衍拓爰祖申陪真食併從令典式備優恩
於歲仲虺為左相於湯寔懋日新之德高平觀故事於
漢益明時用之宜化惟久可以有成志惟堅可以有立
使茂業克家於萬世則令名無媿於前人勉迪訓言欽
承眷意

正右丞相制曰朝廷為政事之本必崇任於真賢王者
置輔弼之官實疇咨於同德朕屬精萬務表治庶工眷

言參預之勤久積具瞻之望擢陞揆路懋翼邦圖寵以

廷揚宜茲猷告

具官留正

才宏識敏學邃理明道君子之常

應百為而有守任天下之重采衆善以為公自綰帥權
趣膺召渥出藩入輔浸高密勿之聯武緯文經并建長
久之道內翊廟巖之穆外綏疆圉之安成績居多褒章
可後是用進從二府置位中台若元首之有股肱共恢
於邦體若巨川之作舟楫協濟於化源朝論正則廉節
具昭士論孚則勞能並萃惟幾康而弼直選掄敢輕載

清靜以民寧規恢益重爾期予治予匪爾私仍稽懿典
之常併陟文階之峻荒開采邑衍實豐租式備恩徽聿
崇宰柄於戲帝賚傳說以沃商宗之心天授留侯其興
漢世之業惟盡忠足以體眷毗之厚惟加勉足以究施
設之宜俾予永底於阜康繄汝與膺於休美尚祇茂命
彌集顯庸

光宗即位二月壬辰必大授少保依前左丞相進
封益國公正授正奉大夫依前右丞相清源郡開

國公

必大加少保制曰朕祇奉慈謀欽承丕緒任大守重豈
夙夜之敢康謨明弼諧繫股肱之攸賴眷予上宰為國
宗臣既久翊於熙朝茲首禪於初政宜疏異渥以答殊
勲爰輯廷紳誕揚詔綽

具官周
必大

忱恂而博達端亮而精

夷經濟之才足以開物而成務淵源之學始於誠意而
正心頃自機庭晉登揆路脩明百度雖小物而克勤酬
酢萬幾遇大事而能斷民瞻益聳國勢愈強仰惟壽皇

將舉內禪厥既傳之以道又復遺之以賢乃升冠於冢
司俾輔成於聖計屬茲繼體方慶澤之廣覃其於褒公
詎徽章之可後肆陞華於亞保庸增重於元台併開大
國之封申衍爰田之食式昭瞻遇深厚倚毗於戲聖賢
相逢治畢張夙已彰於成效后臣克艱政乃又今方竚
於嘉猷益究乃心奚俟多訓

正加正奉大夫制曰春秋法五始之要莫嚴授受之功
君臣猶一體而成允賴贊襄之益眷時次相翊我兩朝

既茂著於殊勲蓋特加於顯渥誕敷不訛亶告羣工

具官

留正學貫天人才全文武秉心剛毅如砥柱之屹中流應

物從容若洪鐘之在華簾徧揚中外備罄忠勤頃預政
機兼持樞筦謀猷辰告莫非經遠之基事業日新允有
濟時之略洪惟慈宸深念永圖將與子以親傳必求賢
而夾輔爰升揆路對秉國鈞神器有歸密贊膚謨之大
成規恪守實禋初政之新屬盛際之親逢宜褒章之首
及是用陟文階之兩秩陪采邑之多畬以昭委寄之隆

以示寵光之厚於戲因輔佐而繼統業雖無事於更張
當閒暇而明政刑尚益思於勵翼往祗厥命其永有辭
紹熙元年正月甲戌正以修製奉上壽聖皇太后
至尊聖皇帝壽成皇后尊號冊寶充禮儀使遷宣
奉大夫

同日王蘭叅知政事

自禮部
尚書除

葛邲同知樞密院事

自刑部
尚書除

蘭叅知政事制曰

具官
王蘭

自居班列即簡朕心聽其議論

見其可以有行觀其風采知其足以任重處之朝廷而
貪倭自遠試以方面則威名益聞涵養既充氣識深厚
比召前於宣室遂擢長於春官朕所眷懷用之猶為未
盡人之屬望歎然常若有餘不踰閱月之間俾贊中台
之重朕每憂一日萬機之繁未之攸濟爾當思千載一
時之遇惟既厥心適觀爾成同歸于治

邨同知樞密院事制曰朕建東西二府以議大政

闕

兩柄以恢遠圖宜得老成之儒贊吾夙夜之命爰疇碩

望增重公朝

具官
葛邲

學洞古今文參造化議論通達究經

術淵源之歸資稟粹和得東南溫厚之氣小心一德事

朕歷年徧儀華近之班備罄論思之益父祖迭居於法

從時乃世臣聲名充滿於朝廷亶為先覺擢自秋官之

長進陪斗極之嚴

云

蘭字

闕

無為人邲字楚輔安吉人

乙巳蕭燧罷叅知政事

除資政殿學士提
舉臨安府洞霄宮

燧自淳熙十五年正月除叅知政事是年正月罷

執政一年初詔燧為資政殿學士與郡既而燧乞
奉祠從所請依舊職名提舉洞霄宮光宗即位下
求言之詔詔曰卿以純明亮直嘗位三事聖父之
所改容而體貌者也肆予冲人頃賴羽翼夫卿既
以清節雅行從朕於潛晦之時豈不能以忠言嘉
謨助朕於纂承之始竚聞猷告以副虛懷燧手疏
六事語甚剴切表乞休致優詔不允紹熙四年卒
年七十七積官宣奉大夫特贈金紫光祿大夫謚

正肅燧學問精博持身玉雪論事金石聲色貨利
無所徇接物雖和然不可干以私安恬不競人不
得而親疎

宋宰輔編年錄卷十八終

欽定四庫全書

宋宰輔編年錄卷十九

宋 徐自明 著

光宗淳熙十六年

己酉

用實錄修

三月甲寅前宰相史浩授太師

自太傅保寧軍節度使致仕魏國公授太

師依前
官致仕

制曰朕欽承內禪之丕基寅紹中天之景運行慶施
惠方布令以惟新褒德錄賢在疏恩而宜渥眷時元
老歷事三朝蓋揖遜之再逢盡優崇之特異誕敷顯

冊播告昕廷

具官史浩

忠肅而惠和寬閎而溫厚皇圖首

翊獨高爽日之功揆路荐登深慰作霖之望功成身

退德邵年高惟甘盤舊學之臣既尊榮之莫及邁郭

令中書之考豈壽祉之可量肆是纂圖尤深注想敬

遵慈訓用舉徽章峻陞論道之班俾正維師之位寵

仍兼於制間禮益厚於垂車併衍真租式昭異數於

戲天下大器念付託之匪輕舊德元龜方諮諏之是

急諒不忘於王室必樂告於爾猷尚罄厥誠以荅殊

遇

光宗自乾道七年二月癸丑自恭王立為皇太子
淳熙十六年二月壬戌孝宗詔禪位上即帝位三
月甲寅太傅保寧軍節度使致仕浩授太師上既
即位詔求讜論令學士院降詔卿被遇壽皇亶為
舊學出入將相宣勞二紀當今耆艾孰踰卿者其
悉條以上副朕傾渴之意公封事數千言皆當世
要務孝宗移御重華宮以宴處清閑思見舊學上

為頒詔諭賜御劄紹熙二年二月遣御藥楊舜卿
撫問趣行初重華之召浩引辭甚切孝宗諭曰今
與卿皆閑人當衣褐見何必求免耶詔乘肩輿入
隔門仍命孫定之扶掖特改京官朝退次詣重華
孝宗從容謂浩曰與卿復得相見既無嫌疑足可
為度歲計毋亟言歸又顧浩曰卿輔朕初潛親遇
朕建朱邸陞儲宮登大寶兩居相位三入經帷逮
今三十餘年君臣相得殆非他人比也再對奏陞

下召臣非徒使霑被寵光亦欲少裨繼明之治敢
為四說以獻曰立天下之大本平天下之隱難收
天下之人望伸天下之直氣謂教皇子備邊境舉
人才受盡言也上垂聽獎諭再三五年四月五日
薨年八十九計聞孝宗及上震悼賻贈有加詔太
師浩身居極品又係至尊潛藩舊學贈恤之典禮
宜優異特追封會稽郡王寧宗皇帝登極賜謚文
惠御書純誠厚德元老之碑以賜焉詔翰林學士

樓鑰狀其行

五月甲午王藺知樞密院事兼叅知政事

自太中大夫禮部尚書除

紹熙元年正月以尊號冊寶加通議大夫

丙申周必大罷相

自少保左丞相益國公罷為觀文殿大學士判潭州

制曰三孤洪化允資弼亮之謨十國為連更賴蕃宣之略任雖隨於內外寵不異於始終爰即昕庭誕敷丕號

具官周必大

量宏而識遠德鉅而材全文高黼黻之華學富

經綸之妙忠勤體國孜孜而無不為通敏濟時綽綽乎

有餘裕繫天下之重望結慈宸之深知預大政而秉洪
樞迭司二柄繇次相而登上宰光輔兩朝舜傳有助於
詒謀益贊克禪於繼治肆升亞保增峻元台股肱良而
庶事康方觀成效紀綱張而衆目舉甫立宏規俄遽露
於需章願亟還於相印諭旨丁寧而莫奪陳情堅確而
弗移旣雅志之重違在茂恩而宜厚是用付以長沙之
巨屏俾作牧於上游寵以書殿之大名仍通班於左棘
罔替眷懷之渥式昭體貌之優進退有光觀瞻咸聳於

戲作舟楫汝用惜不為於朕留毋金玉爾音尚素殫於
我告勉祇明訓益懋外庸

必大自淳熙十四年二月拜右丞相十六年正月
拜左丞相是年五月罷入相二年餘○時右諫議
大夫何澹論奏左丞相周必大不公不平不正之
罪有十伏望亟賜罷斥詔周必大弼諧初政求去
甚力已除觀文殿大學士判潭州殿中侍御史范
處義復奏欲望因其辭免特從所乞併罷職任以

少保奉祠歸里從之紹熙元年十月以少保充醴泉觀使益國公周必大判隆興府二年正月留正奏周必大再以祠請上曰必大堅不肯出此果何意正奏或為當時言者尚在未敢輕出今與除職奉祠又恐或招人言胡晉臣言祖宗時前宰相在外奉祠未有不帶職者上曰俟郊禮後旋議除職乃所以保全之七月除觀文殿學士判潭州三年三月復觀文殿大學士寧宗即位除少傅醴泉觀

使益國公

少傳制曰朕祗膺駿命寅紹丕圖舊弼偃藩甫遂內祠
之佚需恩進律爰升亞傳之崇乃輯羣工用孚渙號

具官

周必大道隆而德備實茂而聲聞自有書契以來悉能該

綜首以詞章之選入踐清華西掖北門周旋累歲高文
大冊震耀四方運參秉於事樞肆進專於國柄謀謨經
遠任社稷以不疑精神折衝撫華夏而咸肅久辭相印
起殿帥垣乃為綠野之游自適東山之志眷冲人之嗣

服方歌求助之詩想元老以興懷嘗下乞言之詔茲頒
異數就陟孤卿夏篆通彊班浸高於左棘衮衣赤舄禮
增煥於三槐仍衍故封併加真食於戲嘆股肱之美庸
加二公洪化之名進藥石之規式究致君澤民之蘊尚
孚明命母有遐心

紹熙元年

庚戌

七月甲寅葛邲叅知政事

自宣奉大夫同
知樞密院事除

胡晉臣端明殿學士簽書樞密院事

自太中大夫給
事中兼侍讀除

王蘭樞密院使

自知樞密院事除

乙卯留正左丞相

自宣奉大夫右丞相遷金紫光祿大夫除

制曰朕紹承丕緒躬覽萬機朝廷以正百官允賴表儀之建人主之論一相尤嘉輔翼之勤維時鴻碩之才積有弼諧之效肆疇重望載陟上台播錫制綬亶孚朝路具官留正性端而識邁志廓而量夷與學逢原究賢哲經綸之蘊英猷致遠達古今平治之方自膺慈極之深知徧躡中朝之華胄出則顙臨於藩閫入則參掌於鈞樞維

石之具民瞻踵登次輔飛龍之位天德首賴成模暨浸
閱於歲年采究勤於朝夕氓編輯穆邊瑣晏清以脩百
度則職業畢興以劭三農則雨暘咸若有嘉乃績宜服
予恩是用榮持魁柄之崇就領冢司之重代天理物圖
成無改於前規佐王均邦顓任彌高於列辟仍衍圭畬
之富申陪封戶之真峻乃文階懋茲徽渥併從輿望式
示眷懷於戲為政而執其中朕每恪遵於舜命作相而
置諸左爾思永靖於商邦既能先正乎心術之微故克

盡合乎公道之美勉祇丕訓益底茂勲

正授左丞相兼監修國史提舉編類聖政時右相
虛位公屢以為請上曰古者多任一相今方責成
於卿宜體朕意公與同列奏事後殿上謂公等可
各具當今為治先務數條來上公上疏陳五事上
深納之多所采用八月進呈安奉壽皇玉牒日歷
積階授特進先是是年春奏事留身乞建儲上曰
且待商量後累入奏上雖納公奏未果從也二年

冬上以心氣不豫未能視朝時外議洵洵公與同
列間至福寧殿奏事入則具言朝廷無事以安上
心出則報行得旨合處分事與中外除目以安人
情歲則辛亥蓋初郊之季也十二月公爵進封申
國公三年三月上病浸平公懇祈歸政上力留公
臺臣亦合辭奏言近者聖躬愆豫留某維持紀綱
忠勤備至今陛下初御內殿幾務方繁非宰臣求
去之時乞宣諭公俾安相位遂不得請十二月進

呈安奉壽皇聖政授公少保衛國公累辭而後受
四年有李端友者以椒房之親內批除郎公以御
筆繳還上不納公執奏不奉詔遂納之御榻而退
三月以葛邲為右丞相四月有旨召姜特立公言
唐憲宗時李絳不與吐突承璀共立於朝特立向知
閣門事日臣為右相嘗列其招權之狀特立奉祠
而去已經四年今既召還臣合罷相與李絳一同
遂居家待罪越七日不報遂出國門乞解機政奏

言陛下近年不知誰獻把定之說遂至每事堅執
斷不可回臣居家八日出門三日並皆不報此把
定之說誤陛下也云云復不報乃次范村僧舍自
是徂冬凡五閱月上寤遂寢特立之召公生日遣
中使持詔賜生餼如儀於是壽聖皇太后年登八
袞羣臣請上尊號曰壽聖隆慈備福將以冬至恭
上册寶詔以公為禮儀使攝太傅令宰屬諭旨使
者相望趣公以歸入見上大喜凡累月有疑而未

決之事數日施行殆盡是日車駕過北宮時雪隨

應以冊寶禮成授公少傅進封魯國公

林大中
狀其行

少傅制曰宅百揆以奮庸莫重上台之任立三孤而洪

化載崇亞傳之聯朕肇纂丕圖恭修庶政既趣還於大

老爰特畀於隆恩錫以言緡格於公聽

具官
留正

器深識遠

才鉅量宏博極羣書賁古今而有用迪知九德參上下

以盡誠繁機久試於登庸成績具宣於變理自持魁柄

久罄忠謨勤勞先四近之班進退凜大臣之節瞻巖石

之峻方推師尹之賢歸衮衣之華彌著我公之懿屬當臨
御之始尤賴經綸之長堯舜陳於王前固非無道蕭曹
安乎海內實在同心百度期於畢修衆職資於總領念
倚毗之滋厚豈褒陟之可稽是用升崇左棘之班仍宅
冢司之任篆車加賁庸新朝路之儀茅社增光併衍戶
租之賦茲符僉議匪曰私恩於戲左右得其人方藉調
娛之助居處必以禮尚殫輔贊之勤繫在元臣詎煩深
詔

五年正月葛邲去位時孝宗服藥上以病未能省
觀公與知樞密院事趙公汝愚等日以為言五月
戊辰孝宗疾勢日亟公與同列求對侍從臺諫隨
入殿庭力請過宮上拂衣起公引上裾泣諫同列
及侍從臺諫從至福寧殿門上亟還內公退上疏
極論今日亡國之事其大有四皆人所不敢言者
六月戊戌孝宗升遐癸卯大斂百官在廷俟候成
服車駕未至中外洵甚公與同列謀請太皇太后

垂簾奏知壽皇之喪不可無主祝文稱孝子嗣皇
帝宰相不可代行乞降旨立皇子嘉王為皇太子
權監軍國事代行祭奠之禮太皇太后不肯出與
同列屢乞奏事不報乃入奏乞立嘉王為皇太子
言臣等伏見近日中外人情不安輿訛造謗無所
不有臣等朝夕思所以為鎮壓之計莫先於重國
本宜早正儲位以安人心又奏擬指揮乞御筆批
依付學士院降詔施行奉御批八字公與同列即

再請對不報乃復奏言立儲事不可緩望睿明獨
斷速賜施行至是奏凡四上不報公即出國門上
表乞致仕其末曰願陛下速回淵鑒追悟前非漸
收渙散之人心庶保靈長之國祚識者知公惓惓
之忠也越二日太皇太后命皇子嘉王即位於重
華宮尊皇帝為太上皇帝以公為大行攢宮總護
使○初公主議謂上皇以疾不能主大行皇帝之
喪宜端默三年立皇子嘉王為皇太子權監軍國

事若終喪後上皇未有倦勤之意則當復明辟如
議內禪則皇太子可即皇帝位既而趙公汝愚欲
因左司郎徐誼尚書郎葉適遣韓侂胄通巨璫張
宗尹關禮使以內禪奏請於太皇太后公謂建儲
降詔之命未下而遽及此情禮未安兩宮父子之
間他時有難處者議論不合入奏復不報遂力求
去及太皇太后命上即位上頓首固辭太皇太后
令內侍扶掖上出簾以黃袍加聖躬上遜避顧謂

趙公汝愚曰恐負不孝之名群臣再三祈請上却位移時而不坐其後侍郎鄭是言陛下自臨御以來不以天位為樂而以未見兩宮為憂中外皆知陛下本心非利於有天下然上皇之心猶有未釋然者是以陛下未得盡子道也又言仁祖初建東宮不以為喜而以不得日侍帝后左右為憂今陛下踰年於此矣而問安視膳之敬猶未獲伸諒聖情思慕之切當又甚於仁祖上納其奏愀然久之

蓋公之所慮者在是也○先是孝宗大漸謂太皇太后曰宰相須是留某不可輕易寧宗即位入謝太皇太后曰公公在日只知重留丞相聞已去可速宣押乃賜御札入庚牌遞遣內侍二員水陸並進召公且令所至勸進公即同使者入見賀上初登天位誠為宗廟社稷計上曰方賴協贊以起治功是時上居行宮主大行皇帝之喪公請車駕一出慰都人之心定壽康宮於南內撤去所增禁旅

以安中外悉從公奏也輔臣皆次遷授公少傅公
控辭不拜章五六上復言國步多艱壽皇厭代升
遐上皇抱疾不出太皇太后因立陛下以安宗社
陛下勉徇羣情以登大寶正宜遇事從簡示天下
以不得已之意然後可以立國誠非頒行封爵之
時上從公請

狀行

十二月乙酉王藺罷樞密使

藺自淳熙十六年正月除叅知政事五月除知樞

密院事是年七月拜樞密使是月罷執政幾二年
御史中丞何澹言中外喧傳樞密使王藺之弟萊
知池州貴池縣暴狠不法凌蔑州郡郡守張金乞
行迴避語併及藺詔王萊降一官放罷而藺亦乞
奉外祠從之三年四月通奉大夫提舉洞霄宮王
藺奏以臣憂病之浸乞收還除職帥蜀恩命遂與
職名依舊官觀先是王藺降充資政殿學士至是
復觀文殿學士尋又降充端明殿學士四年三月

除知江陵府寧宗即位除資政殿大學士知潭州

丁亥葛邲知樞密院事

自叅知政事除

胡晉臣叅知政事兼同知樞密院事

自端明殿學士叅書樞密院事除

三年六月癸卯晉臣免兼同知從所請也

紹熙三年

壬子

六月辛丑陳騤同知樞密事

自禮部尚書除

騤字叔進台州人

紹熙四年

癸丑

三月辛巳葛邲右丞相

自光祿大夫知樞密院事遷特進除

制曰朕纂紹皇圖宣昭聖治深惟輔弼之任當盡忠誠之謀爰簡蓋臣要先心術之正俾司宰柄實贊政幾之繁肆擢自於元樞沆奮熙於百揆誕揚制綽顯告廷紳具官葛邲博大沈恂靖恭純裕學該行備居循先哲之規識遠用宏動契經權之會粵繇實茂寢展謨明稔殫政路之勞陞總事機之祕副予隆委逮此累時嘉素蘊之旣攄允具瞻之攸屬茲懋經於邦典適崇建於台司宥密

而單厥心聿觀成績彌縫而藏諸用允藉宏猷是用釋
本兵之權居次輔之位俾同寅於朝廟期納誨於夙宵
仍文階采邑之增示厚禮徽恩之備於戲觀左右惟人
之誼固在於協心思旦夕承辟之勤勿忘於勵志無輕
去就以共圖於治効庶幾休顯而克邁於前賢尚服訓
言式對褒命

同日胡晉臣知樞密院事

自叅知政事除

陳騷叅知政事

自同知樞密院事除

是年七月通議大夫知樞密院事胡晉臣致仕尋
卒贈金紫光祿大夫資政殿大學士致仕告詞畧
曰天賦純誠世推厚德仁者必勇立朝多蹇諤之
風正而不他致主盡忠清之節謚文靖

同日趙汝愚同知樞密院事

自吏部
尚書除

制曰西漢以同姓疏封不在公卿之位東平以至親輔
政厥由聲望之隆惟我本朝尤厚皇族始則優加祿爵
曾弗任於外廷後雖並用親賢亦無踰於法從茲開宥

府蓋得宗英

具官趙汝愚

派出天潢望高國器早隨寒雋首

冠於儒科出在蕃宣久臨於蜀部侍經帝幄選士貢闈

皆故事之所無在爾身而兼備爰以樞極之寄託之肺

腑之親必有若人乃堪大任匪固私於異渥將深慰於

公言噫開國以來未有今日非常之寄本兵至重當展

平生有用之才以增磐石之光以壯維城之勢

樓鑰詞

汝愚字子直開封祥符縣人太宗皇帝元子漢王

元佐八世孫祖申公不求自南渡來嘗監饒之餘

干酒稅後遂家焉乾道二年汝愚以鎖試奏名孝
宗親擢為第一○紹熙四年以吏部尚書知貢舉公
之為吏部尚書也當光宗即位之三年因郊感疾
而五日一朝之禮少輟至誕節冬至車駕皆不過
重華宮公對便殿極誠諷諫光宗開悟獨懼孝宗
意或不樂乃諭公先以此意奏稟重華公舊以宗
姓與嗣秀王伯圭善乃力請嗣王調護兩宮於是
兩宮之情遂通光宗乃率中宮俱詣重華從容終

日都人大悅是月遂除同知樞密院事

行狀

○方公

自蜀召還也孝宗內禪之議已決聖意盖有所屬而殿中侍御史范處義忌之甫入脩門而不果入公嘗以本朝名臣議論自建隆以來迄於靖康以類編次後成三百卷遂奏請擇其中尤切於治道者為百五十卷上之孝宗嘗諭宰臣周必大等曰治道盡在此矣洎公進登樞筦故事詣重華宮方叙謝孝宗曰卿以宗室之賢為執政乃國家盛事

卿在蜀時所進奏議極好朕嘗謂此書可與資治

通鑑並行故嘗易名其書為治道集蓋用孝宗獎

諭之語也

同上

○監察御史汪義端奏臣伏見以降

聖旨趙汝愚除同知樞密院事此國朝典故所未

嘗有也臣詳考得宗室之不為執政祖宗法度守

此至嚴原始初之立意決不苟然者是以中興會

要具載紹興六年正月內高宗皇帝聖語有曰唐

用宗室為宰相本朝宗室雖有賢才不過侍從而

止乃所以安全之也又具載紹興十四年十一月
內宰執進呈乞以軍器監子厚暫權吏部侍郎宰
臣秦檜有曰今日宗室所宜崇獎令聚於朝高宗
聖語有曰宗室之賢孝如曾中科第及不生是非
之人可置行列如寺監秘書省皆可處之祖宗以
來不用宗室作宰相其慮甚遠可用至侍從而止大
哉聖謨昭如日星正今日所宜謹守而不渝雖以
壽聖皇帝雄略遠馭立賢無方唯才是用唯於擢

用宗室則一守高宗聖訓未嘗處之以為執政也用宗室以為執政尤失防微之意陛下所以用汝愚者豈以其曾為大魁有異於其他宗室故特越常藝而用之歟臣謂科目高下亦出於一時偶然耳祖宗典故乃一切不暇問無乃酬之大甚而予之大過乎崇寧間有子崧者禮部奏名為第一賜進士出身除從事郎職官差遣是亦有科名矣宣和間為侍從以忠言忤權貴出知淮寧府適當靖

康京都之變慷慨誓起諸道勤王師以復世讎堅
守淮寧迄保境土親為書數千百言以責偽楚張
邦昌及姦臣徐秉哲等遂翊高宗以中興高宗當
擾攘之時而遂任以本兵之柄其誰曰不可然而
不過一除為徽猷學士再除為端明殿學士而止
夫子崧之科名豈不少類於汝愚而忠義功勞則
過之高宗未嘗除為執政聖慮可謂甚遠不報義
端更不赴臺供職遂除為軍器監義端辭詔與郡

實錄初公之知貢舉也時監察御史汪義端為參詳
官險薄專橫好為異論公每抑之故公同知密院
也公方援高宗聖訓控辭而義端挾貢闈私憾論
公新除不當光宗為遷義端列寺少卿而給事黃
公裳復論義端罷之公愈不安凡十三疏力辭光
宗於是謀之孝宗乃宣諭宰執令召當筆學士申
諭朕意明言高宗聖訓所以沮秦檜之姦謀故詔
語有云若乃紹興之故實蓋有為而言況我壽皇

之疇咨欲播告於衆蓋述兩宮之意也公自初除

閱二十六日始拜命

行狀

七月壬午趙汝愚知樞密院事

自中大夫同知樞密院事除仍進封開國公五

年七月己巳
兼參知政事

制曰朕延登樞臣方務親賢之並用擢專兵本豈以日

月而為功式隆磐石之宗益聳維巖之望

具官趙汝愚

僊源

有自天分素高發之以場屋之聲名博之以師友之問
學論思禁路有貞爭臣之風鎮撫藩方著古循吏之績

望之堂堂折而不撓玄齡孜孜知無不為卓爾士夫之間居然公輔之器頃為儲案已知許國之忠茲貳機庭尤見愛君之篤俾陞宥府之長密贊中宸之謀增衍真腴併昭異數噫三軍五兵之問雖未至於朝堂一日萬幾之繁正有資於帷幄朕方越拘攣而圖任爾其勉忠力以赴功惟既厥心同底於治

樓鑰詞

十一月慈福宮冊禮畢轉太中大夫

制曰迺十有一月癸未日南至朕帥中宮從以婦子朝

於重華獲陪親尊上顯號於王母惟一朝四世非常之

休則亦二三股肱克相孝治以輯盛儀可無茂恩昭示

褒律

具官趙汝愚

任重而道遠經明而行修瞻言累朝篤叙

同姓然自熙寧以進士對策而卿始以謹議冠群英自

治平以儒臣本兵而卿始以雅望位三事卓爾不群百

年而後見之朕甚嘉焉屬茲成禮盍圖爾功維昔太任

儀刑姜嫄功在十亂德在二南於是周公推本徽音作

思齊之詩以歌之而仲尼定為六藝傳信萬世朕今逮

事過於成王繫卿特書不在周公之下疇勞進秩實應
經誼噫繼自今卿其家人陪朕歲上萬年之觴顧不偉

歟
陳傳良詞

公在樞庭每進對詞婉而切彌縫甚至大抵多主
調護雖同列所陳不無扞格及聞公奏聖情即悟
屢有翻然夙駕之意不幸間言易入作而復輟五
年五月孝宗疾勢浸劇光宗方御後殿丞相留公
正率同列力請過宮不從明日留公等待罪光宗

有旨宰執並出於是俱出浙江亭俟命而留公徑至六和塔孝宗聞之憂甚使諭宰執入城且有始終扶持之語公等乃復歸第六月戊戌夜孝宗大漸光宗既不出延見大臣宰執不得已退率百官詣重華宮發喪是時人情洶洶中外阻絕無所用
力公遂與中書謀請憲聖垂簾權主喪事憲聖問知有典故始傳旨令朝廷施行是日乃成服於時事勢危迫思所以計安天下無若建儲公與宰執

同入劄子請早定儲位以安人心不報再請乃付
出批云甚好公再乞御筆下學士院降詔但付出
御批歷事歲久念欲退閑八字自是連日繼請降
詔之命竟不下數日復奏而牘尾有御批留公大
沮七月辛酉朝臨忽踣地退治去計先是孝宗疾
勢彌留京口諸軍妄疑朝廷秘不發喪欲相率編
素向闕遠近惶惑至是建儲之請既格而留公又
欲引去公自度不得辭其責乃亟謀贊成內禪之

舉公嘗與殿帥郭杲論京口事知杲忠實可共謀
國事獨患未能達意於杲使備宿衛聞工部尚書
趙彥逾嘗有德於杲公亟使言之杲欣然聽命公
即折東報留公措置已定願少留不聽留公夜潛
去由是人心益搖時慈福宮內侍張宗尹與閤門
韓侂胄厚善公乃使侂胄以內禪之議附宗尹入
奏憲聖憲聖宣諭令公且耐煩公心知憲聖有主
張意明日再遣侂胄復申前請侂胄又令宗尹附

奏亦竟不得要領適遇提舉重華宮闕禮嘗久事
孝宗禮問知公意令侂冑少俟即入泣告憲聖以
趙知院亦有欲去之意憲聖大悟遂命闕禮傳旨
令侂冑諭公所請甚好甲子禪祭因請憲聖垂簾
公與同列奏言請皇子嘉王可即皇帝位尊皇帝
為太上皇帝憲聖稱善時闕禮先以憲聖命請上
入簾下憲聖勸上即位上稽首固辭憲聖命內侍
扶掖出簾屢以黃袍加聖躬上屢却之顧謂公曰

恐負不孝之名公曰天子當以安社稷定國家為孝今萬一有變亂卒起當置太上於何地陛下尚得為孝乎上被黃袍却去不坐公率同列再拜稱賀乃引殿帥郭杲步帥闊仲入賀杲仲先退如祖宗故事分兵宿衛南北內少頃上詣几筵燒香哭盡哀行禮久之公等再三祈請上始就御坐百官起居退親行禪祭之禮頃刻之間群情欣慰中外俱定光宗內出禪位手詔丙寅大赦天下始孝宗

違豫上下憂懼興訛造訛異議沸騰褒揚有歸正
人潛謀為變者若非聞赦解散必大貽朝廷之憂
於是人益知內禪之舉為不可緩云是月權參知
政事

行狀

○公之遷知院事也以車駕久不至北內

及武興吳挺物故未有主帥日久憂懼堅辭不拜
時朝廷將以長至奉上慈福冊寶而左丞相留公
正以論姜特立待命於郊累月不召右丞葛公邲
又方被論請去中書進擬差禮儀使光宗面命公

為之公對冊禮重事故皆以宰臣為使今陛下捨
兩丞相而用臣恐事體太輕非陛下嚴奉祖后之
意乞於兩丞相中選差一人光宗許差留公公即
請降旨差中使宣押及遣宰屬往諭旨且請冊禮
前先詣重華於是留公復相長至前五日車駕過
宮都人大悅冊祀成有旨趣召公受告公復奏曰
稽違恩命臣罪大矣然能用臣言臣敢不拜今陛
下已過宮留正已復相惟是武興久不置帥恐貽

朝廷西顧之憂陛下除帥臣即受告不敢復辭光
宗欣然許之公乃拜命竟以張詔代領武興之軍

余端禮同知樞密院事

自通議大夫
吏部尚書除

端禮字處恭龍游人

紹興五年

甲寅

正月葛邲罷右丞相

授觀文殿大學士依
前特進判建康府

制曰咨股肱於揆路實司庶政之權付管鑰於陪都式
藉重臣之望惟時近弼久位中朝茲祈解於繁機肆出

膺於隆委誕敷制綽敷告廷紳

具官葛邲

迪行忱恂賦資溫

粹早遇光華之治浸預秘謀雅輸輔翼之勤允嘉舊德
逮徧更於二府爰顯陟於中台休休有容本務彌縫而
藏用謙謙自牧乃希明哲以保身雖疊聞議者之言顧
敢替相臣之禮勉留備至懇退彌堅朕審其累奏之莫
回念其在公之盡瘁用頒宸指俾釋宰司書殿隆名班
特高於儒學帥藩要地任增重於居留體貌斯全眷懷
惟厚於戲觀納誨之益置諸右以俱宜思告猷之忠順

於外而勿怠其承予命往集爾庸

邲自紹熙四年三月拜右丞相是年正月罷入相

不及一年時聖體違豫諫官章穎論葛邲疏十餘

上俱不報至是遂罷相判建康府尋改授隆興府

寧宗即位下求言之詔自觀文殿大學士醴泉觀

使除保信軍節度使開府儀同三司後以贈少師

寧武軍節度使衛國公致仕配饗光宗廟庭

宋宰輔編年錄卷十九